


Kulić Enver – Kula



Dana 3. februara 1999. godine u Sarajevu umro je gosp. Kulić Enver – Kula, geometar.

Rodio se u Sarajevu 15. septembra 1945. godine, gdje se i školuje, te 1967. godine završava Geodetsku tehničku školu. Iste godine zapošljava se u Geodetskom zavodu Sarajevo gdje radi sve do preranog penzionisanja 1990. godine.

Sve povjerene zadatke naš Kula je obavljao sa lakoćom i uspjehom mada se nekad radilo i o poslovima više spreme. Svoj radni vijek počeo je terenskim radovima na radilištu Glamoč 1967 godine kao mladi pripravnik, a već slijedeće godine radi na numeričkom premjeru Sarajeva – staro gradsko jezgro Bašćaršija R 1:500. Baš ovi radovi ostavit će vidan trag na njegovu karijeru stručnjaka geodezije.

Terenske radove iz oblasti premjera izvodi uspješno kao izvođač, kao instruktor na obuci mladih kadrova i kao tehnički kontrolor, sve do teškog oboljenja srca – marta 1983. godine. Prokrstaro je BiH uzduž i poprijeko na terenima Glamoča, Sarajeva, Banja Luke, Viteza, Busovače, Modriče, Stanara, Konjica, Laktaša, Travnika, Zavidovića, Čapljine, Donjeg Vakufa, Zenice, Gradačca, Srebrenika, Dervente, Vareša, Foče, Krupe, Kaknja, Konjica i Teslića.

Radove iz oblasti premjera u kancelariji obavljao je kvalitetno zimi između terenskih sezona i poslije 1983. godine sve do penzionisanja 1990. godine.

Naš Enver uz to što je bio dobar radnik, bio je i dobar čovjek, veliki prijatelj što mi u Bosni kažemo veliki jaran i raja. Bio je omiljen i kod starih i kod mladih i na selu i u gradu, na poslu i van posla, kratko rečeno svugdje. Druženje sa njim bilo je veliko uživanje za sve nas. Njegovu veličinu kao čovjeka, ni ratno ni poratno vrijeme, nije uspjelo poremetiti, jer je znao razlikovati dobro od zla i čovjeka od nečovjeka.

I na kraju za njegove najbliže: suprugu Amiru, kćerku Sanelu i sina Selima i njegove porodice neka bude utjeha ono što je ostavio iza sebe kao čovjek, kao stručnjak, kao prijatelj, kao građanin a nadasve kao uzoran suprug i otac.

U ime njegovih kolega i kolektiva Geodetskog zavoda još jednom velika mu hvala.

Perišić – Drljević